

بسم الله الرحمن الرحيم

سلسلة (طفل يفكر)

كتبها محمد خليل الكسيح

المحتوى العلمي من جروب حكايات
الفيزياء للمؤلف

الحوار المكتوب بين الأب وطفله ويمكن
تغييره حسب الرغبة

المشهد 1 (الاهرامات)

الطفل.. بابا ليه الأهرامات.. اهرامات؟؟
الأب.. يعنى أيه؟؟

الطفل.. ليه مش مربع أو دائرة

الأب.. أكيد في سبب هندسي

الطفل.. طبعاً ودا اللي عرفتة من
الإنترنت

الأب.. دا أمتحان بقى

الطفل.. لا بس سبحان الله الشكل وراه
علم كبير زي شبابيك الطيارة

الأب.. مالها كمان؟

الطفل.. الشكل الدائري أقوى ويتحمل
ضغط الهواء لو الشباك مربع الطيارة
توقع

الأب.. مش بس كده الشكل الهندسي
كان سبب انتصار المسلمين في معركة
موهاج أيام سليمان القانوني

الطفل.. أراي الجيش وقف دوائر

الأب.. لا وقف 3 صفوف وبعدين غير
شكله زي مثلث لحد ما جيش المجر دخل
مدى المدفعية وفين يوجعك..

الطفل.. شكلك قرأتي زي عن الأشكال
الاهرام والأشكال الهندسية بس ممكن
تجدد اشتراك النت عشان خلص

الأب.. وماله بس ممكن تقشر الثوم لماما
وتعصر الطماطم

الطفل.. حاااااااااااضر

تمت

المشهد 2 (فطار.. غداء.. عشا)

**الطفل.. بابا في غلطة كبيرة بنعملها في
البيت كل يوم وتجب لنا المرض**

الأب.. أيه بنعمل أيه؟

الطفل.. فطار.. غدا.. عشا بنأكل كثير

الأب.. دا العادي

**الطفل.. لا لازم نأكل لما نجوع ولما نأكل
ما نشبعش**

**الأب.. صحيح حديث الرسول صلى الله
عليه وسلم**

**الطفل.. الصحابة كانوا بيأكلوا مرة واحدة
والناس العادية مرتين والبهائم بس اللي
بيأكلوا 3 مرات**

الأب.. الله يحفظك طب تقترح أيه؟

الطفل.. ما نأكلش كثير

الأب.. طب خلاص نبدأ من بكرة

الطفل.. لا انهارده

الأب.. انهارده ماما عاملة مكرونة باشمل

الطفل.. طب خلاص بكرة
الأب.. بكرة محشي ورق عنب وفراخ
محمرة
الطفل.. طب بعد بكرة
الأب.. لا دا في عزومة عمك سمك
سنجاري وجمبري وسبيط
الطفل.. طب خلاص يبقى بعد بعد بعد
بعد بكرة

تمت

المشهد 3 (الفقايح)

الطفل.. بابا أنت رفضت تشتري فقايح
بابلز ليا
الأب.. طبعا ب 10 جنيه وشوية صابون
الطفل.. صح ب 10 جنيه تشتري 2 لتر
صابون من أحسن نوع
الأب.. صح ربنا يكملك بعقلك
الطفل.. طب عايز شراب جزمة وياريت
تقص ربع زجاجة بلاستيك وشفاطة

الأب.. ماشى وأحط لك مع الصابون
السائل جلسرين وسكر عشان الفقاقيع
تكون قوية

الطفل.. أنت عارف هأعمل أيه

الأب.. طبعاً تجربة مدفع الصابون
منشورة على جروب حكايات الفيزياء

الطفل.. ونوفر العشرة جنيه

الأب.. لا ونفكر شوية

تمت

المشهد 4 (دعوها فانها منتنة)

الأب.. مستعجل ليه يا واد العجلة من
الشیطان

الطفل.. أراي يا بابا وسيدنا موسى
بيقول وعجلت إليك ربي لترضى

الأب.. صح عندك حق.. لازم نأخذ كلامنا
من القرآن الكريم

الطفل.. مش مشكلة يا بابا.. المشكلة
في المصيبة اللي عملتها أنت أمبارح

الأب.. مصيبة أيه؟

الطفل.. لما قلت وأنا بن عمي على
الغريب في المشكلة اللي حصلت مع عمو
أحمد

الأب.. مش فاهم قصدك

الطفل.. سيدنا محمد صلى الله عليه
وسلم بيقول دعوها فأنها منتنة..
المفروض نقف مع الحق مش نقف مع
عمو أحمد ضد صاحب الحق عشان أخويا

الأب.. أنت كده بتربيني يا واد

الطفل.. لا أنا بأفكر معاك شوية

تمت

مشهد 5 (درس جودو)

الأب.. أيدي وجعتني من شيل الخضار

الطفل.. أنت شاييل غلط يا بابا كل الوزن
مركز على كف اليد وجزء منه كمان فلازم
توجعك

الأب.. طب أعمل أيه

الطفل.. في حلين الأول نستعمل شنطة
كتف كده الوزن يتوزع على الجسم كله..

الأب.. والثاني

الطفل.. تحط منديل قماش أو حتى
حاجة جلد مكان الحمل فالوزن يتوزع عند
اليد ويقل الحمل برده

الأب.. دا درس فيزياء بقى

الطفل.. أنا اتعلمت الكلام دا من درس
جودو وأزاي ترفع وزن أثقل من وزنك
الأب.. الجودو كله فيزياء

تمت

مشهد 6 (العقيدة)

الطفل.. بابا عندي سؤالين بمناسبة أني
ختمت الجزء 15 من القرآن الكريم

الأب.. ماشى اتفضل

الطفل.. ربنا الرحمن الرحيم ليه سايب
الظلم والمرض والجوع ويقدر ينهيه في
لحظة؟

الأب.. في سؤال ثاني

الطفل.. الجنة والنار محدش شافهم
فأزاي أحب حاجة مش شايفها وأخاف من
حاجة برده مش شايفها؟

الأب.. أنا مش هاجاوب على السؤالين
ونخليها عصف ذهني بس مهم يكون معانا
دكتور متخصص في العقيدة

تمت

مشهد 7 (ماتش محمد صلاح)

الطفل.. بابا شفت ماتش محمد صلاح
الأب.. لا باشوف الأجوان بس 5 حلوين
وصلاح جاب 3

الطفل.. أنا عايز أكون زي محمد صلاح
بس أنا مش باعرف لعب كرة حتى لو
وقفت حارس باخسر فريقى

الأب.. مش لازم كرة كل واحد يشوف
دماغه بتحب أيه ومتفوق فيه.. أنت أيه
أكثر حاجة بتحبها؟

الطفل.. الرحلات

الأب.. خلاص ممكن تشتغل في السياحة
الطفل.. وبأحب أصحابي جدا.. لما واحد
بيعمل حاجة كويسة بأكون مبسوط له..

الأب.. دي صفة كويسة جدا.. تحب لأخبك
ما تحب لنفسك وتفرح لفرحه

الطفل.. بس أزاى دا يخليني مشهور
ومعايا فلوس كثير

الأب.. مش لازم مشهور المهم تكون
نافع لنفسك وللناس

الطفل.. بس أنا عايز أكون مشهور وغني
زي محمد صلاح

الأب.. قلت لك دا رزق وكل انسان له
رزق بس عارف أيه الكويس في كلامك

الطفل.. أيه يا بابا

الأب.. أنك بتفكر

تمت

مشهد 8 (معمل علوم)

الطفل.. بابا أنا هارمي الكراسة

الأب.. أنت عارف أنك كده بترمي معمل
علوم

الطفل.. زي الشفاطة.. أنت قلت نفس
الكلام على الشفاطة

الأب.. صح جرب كده تنفخ فوق الورقة
في خط مستقيم تلاقى الورقة تطير
لفوق

الطفل.. أيوة العلاقة بين الضغط
والسرعة للهواء.. دي نظرية الطيران

الأب.. أنا بأحب أقول الهواء السريع
بيكون ضعيف والعكس.. وفي كمان
تجربة حفرة في اليد الورقة هتشيل كم
كيلو؟ وممكن كمان تعمل فانوس من
الكراسة.. تجارب كثير من الكراسة اللي
كنت هترميها

الطفل.. خلاص مش هارميها وهأجيب
التجارب من انت أعملها

الأب.. لقيتها في جروب حكايات الفيزياء
الطفل.. شكرا بابا أنت بتخليني أفكر في
كل حاجة حواليا

الأب.. أكيد لما نفكر هنكون أحسن

تمت

مشهد 9 (صلاة الجمعة)

الطفل.. بابا شغل الراديو وقت صلاة
الجمعة

الأب.. عادي ما أنا باعمل كده كل جمعة

الطفل.. لا افتح الشباك واسمع الراديو
من ميكرفون المسجد أو من التلفزيون

الأب.. تمام وبعدين؟

الطفل.. سامع مين الأول؟

الأب.. الراديو

الطفل.. ليه بقى؟

الأب.. مش عارف لازم نذاكر سرعة
الصوت وسرعة الموجات بتاعه الراديو

الطفل.. الموجات الكهرومغناطيسية

الأب.. أسمها كده؟... هاذاكر وأجلك بس
بعد الصلاة

تمت

مشهد 10 (حديقة الحيوان)

الأب.. انبسطت في حديقة الحيوان؟

الطفل.. ايه اللي يبسط.. حيوانات
محبوسة

الأب.. دي حديقة حيوان يعنى حيوان في
قفص

الطفل.. الحيوان في الغابة مش في
القفص زي العصافير في الجو والسماك
في الماء

الأب.. عشان كده رفضت قفص العصافير
وحوض السمك

الطفل.. صح

الأب.. بس كل الدنيا كده

الطفل.. يبقى الدنيا غلط.. أنت عارف يا
بابا أن كان في حديقة انسان

الأب.. بجد

الطفل.. بجد بشر بدل الحيوانات وادفع
تذكرة واتفرج

الأب.. لا دي قلة أدب

الطفل.. بيسموها عنصرية

الأب.. صحيح غلط بس في حاجات غلط
صعب نغيرها

الطفل.. عارف أنا بس بأفكر معاك

تمت

مشهد 11 (فين القبلة)

الحوار مع الأب منفردا

1. نبدأ بسؤال فين القبلة؟.. من هنا...
ليه بقى؟
2. نجيب خريطة ونرسم خط لمكة من
مصر.. يبقى الاتجاه ناحية الشرق
تقريبا
3. نتعلم الاتجاهات شمال جنوب شرق
غرب عربي وانجليزي
4. نشترى بوصلة أو ننزلها مجانا من
جوجل ستور ونشوف الاتجاه
5. نعمل بوصلة بأبرة ومغناطيس وطبق
ماء كبير
6. بالمرة نراقب القمر ونعرف اطواره
وأشكالها
7. ننزل برنامج ستيريليم Stellarium أو
أي برنامج مشابه ونراقب السماء
والكواكب خصوصا
8. ممكن تعمل كيك على أطوار القمر أو
بسكويت بالكريمة

المهم نراقب السماء ونفكر معاها

تمت

مشهد 12 (المبدأ واحد)

الطفل.. بابا عارف أيه الفرق بين علبة
الكبريت والسيارة التويوتا
الأب.. لا

الطفل.. مفيش فرق المبدأ واحد..
الاحتكاك بيولع عود الكبريت والاحتكاك
على الأرض بيخلي العريضة تمشي..
الفرق الوحيد التكلفة الفلوس يعني
الأب.. تمام

الطفل.. طب عارف أيه الفرق بين
زجاجة العطور والطيارة
الأب.. لا

الطفل.. مفيش فرق المبدأ واحد..
العلاقة العكسية بين سرعة الهواء
والضغط بيسموها مبدأ برنولي.. الفرق
الفلوس برده

الأب.. المهم عايز توصل لأيه من حصة
الفيزياء دي؟

الطفل.. عايز فلوس أروح ورشة رصد
زحل مع مهندس محمود عادل في
الشيخ زايد

الأب.. طب شوية ترمس وكوباية شاي
وبرنامج فلك على الموبايل ونطلع
السطوح ونتفرج.. وبرده المبدأ واحد
الطفل.. يعنى مفيش فلوس
الأب.. أراي.. هنروح مع بعض ونشوف
كوكب زحل

تمت

مشهد 13 (الرز استوى)

الطفل.. يا ريت يا بابا الناس زي الرز
الأب.. مش فاهم مستوى ولا كثير
الطفل.. لا متحد ومتعاون
الأب.. الرز متحد ومتعاون أراي بقى؟
الطفل.. هات زجاجة بلاستيك صغيره
وعبها رز وبعدين أغرس فيها عود
خشب أو كام عود.. ارفع الزجاجة
تلاقى الزجاجة اترفعت معاك بقوة الرز
المتحد وماسك في العود الخشب
الأب.. خلاص خط رز وأعمل التجربة
وابقى أرميه للعصافير بعد كده

**الطفل.. يا بابا مش حكاية رز حكاية
مدينة العذاب**

الأب.. مدينة العذاب فين دي؟

**الطفل.. مدينة العذاب قصة خيالية في
مدينة العذاب والسعادة والاثنين جنب
بعض والاثنين شجر وفاكهة وأنهار
وأكل وحلويات وشراب مفيش أحلى ولا
أكثر من كده**

الأب.. فين المشكلة؟

**الطفل.. المشكلة أن السكان مبروطين
عشان كده في مدينة العذاب محدش
بيأكل ومحرومين من كل النعيم اللي
أمامهم**

الأب.. طب وفي السعادة

**الطفل.. بياكلوا ومبروطين عشان
بياكلوا بعض.. صحيح ميقدرش يأكل
بنفسه لكن يقدر يمد الأكل والشرب
لغم أخيه فكلهم مبروطين وشبعانيين**

**الأب.. لكن في العذاب كل انسان اناني
وبيفكر في نفسه عشان كده محرومين
من كل الخير اللي ربنا رزقهم بيه**

الطفل.. صحيح وتعلمت كده ده من
تجربة الرز على جروب حكايات الفيزياء

تمت

مشهد 14 (الأسد هياكلك ولا لا؟)

لقراءة المقالة لازم تكون مذاكر قوانين
الحركة أو قوانين نيوتن وتكون واثق
من نفسك في حل المسائل وناوي
على الدرجة النهائية.. لو كده نبدأ
الكلام

راجع البيت وفاضل على الباب 20 متر
لقيت أسد وراك على بعد 15 متر
جريت بسرعة منتظمة 2 متر لكل ثانية
وجري الأسد وراك بعجلة 2 متر على
الثانية تربيع

السؤال هياكلك الأسد ولا لا؟؟
ولو كان هياكلك ما السرعة المطلوبة
للنجاة من أسنان الأسد؟

الاجابة

بالنسبة لك السرعة منتظمة ف 20 متر
وسرعة 2 متر لكل ثانية يعنى محتاج 10
ثواني للوصول للمنزل

بالنسبة للأسد هنستعمل قانون
المسافة = $1/2$ ضرب العجلة ضرب
الزمن تربيع مع اعتبار أن السرعة
الابتدائية للأسد صفر يعنى كان واقف

المسافة بالنسبة للأسد $15 + 20 = 35$
لباب المنول وهنا ف المسافة اللى
هيمسكك فيها

ومن التعويض تكون $35 = 2ن$ ومنها ن
 $= 5.9$ ثانية ففي كل الأحوال الأسد
هياكلك قبل الباب

لو عايز تعرف هياكلك فين بالضبط
احسب معايا..

مع افتراض السرعة 2 متر لكل ثانية
هيكون

ف $+ 15 = 1/2$ ضرب العجلة ضرب ن2
فيكون ف $= 2ن = 15$ ويكون ف $= 2ن$
من قانون السرعة في الزمن

ومنها ن $= 5$ ثواني يعنى الأسد هياكلك
بعد 10 متر من المنزل

طبعاً لازم تجرى بسرعة توصلك البيت
قبل 5 ثواني لضمان السلامة

لو الكلام صعب ارجع ذاكر قوانين
الحركة أو مدرس رياضيات أو فيزياء
يشرحها لك

تمت

المشهد 15 (الشفافة)

الأب.. شربت العصير

الطفل.. تمام

الأب.. هتعمل أيه

الطفل.. هأرمي الشفافة

الأب.. أنت كده بترمي معمل علوم

الطفل.. معمل علوم أزاى؟

الأب.. الشفافة ممكن نعمل بيها

تجارب (الشفافة المكهربة - الصفة

الشعورية - الشفافة والبطاطس

وغيرها كثير لو كتبت على النت تجارب

الشفافة أو Straw Experiment

هتلاقى تجارب كثير تعملها بشفافة

الطفل.. كده هأرجع لبتاع العصير
وأطلب كم واحدة كمان عشان يكفى
كل التجارب

الأب.. لا هنعدي على المكتب نشترى
كيس وبالمرة بالونات وخط ونقضها
تجارب مع الشفاطة

تمت

المشهد 16 (الدين مش داخل)

الطفل.. بابا في المدرسة أزاى الدين
مش داخل في المجموع والرسم داخل
مع أن الدين واجب لازم نتعلمه والرسم
موهبة

الأب.. صح فعلا أنا كنت فاشل في
الرسم والحكاية دي كانت مضايقاني
جامد

الطفل.. كمان في كلام في التاريخ
غلط وحتى المدرسين بيقولوا لنا بس
طبعاً لازم أجابو زي الكتاب عشان
المجموع والدرجة

الأب.. كلنا كده عشان تدخل كلية
حلوة.. زي بابا

الطفل.. هأدخل كلية حلوة وأفضل
حمار بتعلم غلط

الأب.. الله يحفظك بس دا الواقع ولازم
تتكيف معاه

الطفل.. عارف يا بابا أنا بس بأفكر
معاك شوية

تمت

المشهد 17 (الجنة والنار)

الأب.. اتعلمت كم تجربة اليوم في
ورشة العلوم

الطفل.. 4 اقلب الكوب.. بالونة
السفيرة.. اخنق الشمعة.. البيضة في
الزجاجة

الأب.. كلها عن الهواء

الطفل.. ايوة الهواء شال الورقة والماء
في أول تجربة وزق البيضة جوه الأزازة
وزق البالونة جوه البرطمان ورفع الماء
وطفي الشمعة

الأب.. الهواء عمل كل ده.. طب شفته؟

الطفل.. شفت مين؟؟

الأب.. الهواء

الطفل.. لا طبعا

الأب.. بس أنت مصدق أن في هواء
وأنت مش شايفه

الطفل.. قصدك أيه بابا؟

الأب.. أنت سألتني عن الجنة والنار
قبل كده.. يعنى ممكن تؤمن بحاجة أنت
مش شايفها وبرده تشغل عقلك وتفهم

الطفل.. دي صفات المؤمنين يا بابا في
أول سورة البقرة يؤمنون بالغيب

الأب.. ويفكروا في كل حاجة.. هتعلم
أصحابك التجارب

الطفل.. طبعا خيركم من تعلم العلم
وعلمه

الأب.. كده أنت اتعلمت الدرس صح

تمت

مشهد 18 (28 مايو)

الطفل.. بابا بكرة 28 مايو

الأب.. عادي عشان انهارده 27

**الطفل.. لا بابا بكرة الشمس هتكون
عمودية على الكعبة**

**الأب.. تمام يعنى مكان الشمس هتكون
الكعبة بالضبط**

الطفل.. تقريبا الساعة 12

**الأب.. طب هنستفيد أيه من الحكاية
دي؟**

**الطفل.. أكيد هنستفيد حاجة..
اراتوانيسيس استفاد من ظاهرة تعامد
الشمس بأسوان وأثبت كروية الأرض
وحسب محيط الأرض من حساب
المثلثات**

الأب.. مين.. اراتوانيسيس

**الطفل.. دا كان مدير المكتبة
الأسكندرية قبل الميلاد**

**الأب.. طب أنت من تعامد الشمس على
الكعبة هتسب أيه؟**

**الطفل.. ولا حاجة بس أكيد علماء
الفلك بيحسبوا**

الأب.. بس براافو عليك أنك مذاكر
وبتفكر في كل حاجة حواليك

الطفل.. أنت علمتني أفكر في الكراسة
والشفاطة فأكيد هأفكر في السماء
والشمس..

الأب.. أوعى تبطل تفكر

تمت

مشهد 19 (المغيرة بن شعبة)

الطفل.. بابا قرأت من شوية قصة
غريبة

الأب.. سنو وايت

الطفل.. وايت آيه بس يا بابا دي عن
الصحابي المغيرة بن شعبة رضي الله
عنه وعن كل الصحابة

الأب.. جميل

الطفل.. تخيل حكم بلد والشعب هناك
معجبوش صحابي يحكمهم فعملوا وفد
لسيدنا عمر بن الخطاب وعزلوه

الأب.. في ناس كده.. بس استريح
منهم

الطفل.. هما سابوه.. بعتوا واحد
للمدينة ب100 ألف دينار عشان يقول
أن دي فلوس سرقتها سيدنا المغيرة
ومخبيا عنده

الأب.. دول فجروا بقى

الطفل.. بس على مين سيدنا المغيرة
وقعهم في شر أعمالهم وقال أمام
سيدنا عمر.. لا دول 200 مش 100 فين
الباقي فالكذاب ارتعب واعترف على
طول بالحقيقة

الأب.. فين ناس ما تحبش الصبح والحق
وتحب تعيش في الغلط

الطفل.. بس غريبة يحكمهم صحابي
ويعملوا كده

الأب.. كما تكونوا يول عليكم.. كل أمة
ليها حاكم على مقاسها

تمت

مشهد 20 (الملح بيذوب)

الأب.. عارف الملح اللي بنحب نحطه
في الأكل بيتكون من أيه؟

الطفل.. أيوة طبعا صوديوم بيولع
وكلور سام وسبحان الله مع بعض الملح
اللى لازم مع الملوخية

الأب.. الملوخية بس والبيض والفول..
طب المية اللي بنشربها؟

الطفل.. هيدروجين ذرتين وأكسجين
ذرة واحدة والاثنين مواد مشتعلة ووقود
محركات

الأب.. طبعا عارف العناصر اللي بيتكون
منها جسمنا

الطفل.. لا كم عنصر؟

الأب.. أظن 16 بس الظريف أنها نفس
عناصر الطين بالضبط

الطفل.. طب أيه العناصر دي؟

الأب.. مش عارف تعالى نبحت على
الت ونقرأ شوية عن الحكاية دي

تمت

المشهد 21 (ليه بنأكل الفراخ)

**الطفل.. بابا عارف ليه بنأكل الفراخ
ومش بنأكل الكلاب مثلاً؟**

الأب.. ليه يا عالم

**الطفل.. عشان دي أوامر ربنا واللى
خالفوا أوامر ربنا جابوا لنا الكورونا
والمرض**

الأب.. صح مضبوط

**الطفل..بس محدش بيتعلم برده سنة
1918 جابوا انفلونزا قتلت 18 مليون
بني آدم بسبب عدم النظافة**

**الأب.. بيسموها الانفلونزا الأسباني
بس أسبانيا مالهاش علاقة بالموضوع..
السبب الجنود الأمريكان وعدم النظافة**

**الطفل.. دا حتى موتوا الهنود
بالفيروسات والعفانة بتاعتهم**

الأب.. أنت مذاكر كويس

**الطفل.. زمن الكورونا يا بابا.. لازم
أفهم**

الأب.. الحمد لله على النظافة والاسلام

الطفل.. طالما قلت اسبانيا اسمع دي..
الاسلام لما دخل أسبانيا وكونوا دولة
الأندلس كانوا بيسموا الاسبان أصحاب
الأقدام السوداء.. عارف ليه؟

الأب.. الأسبان كان سود أيامها

الطفل.. لا كانوا مش بيستحموا
فجسمهم يبان أسود من قلة الاستحمام
والنظافة

الأب.. معنيين يعنى

الطفل.. بس ليه أنهارده هما أقوى منا
مع أننا مسلمين؟

الأب.. دا سؤال صعب ومحتاج تفكير
شوية

تمت

المشهد 22 (الماء.. اللغز)

الطفل.. بابا الماء بيغلى من غير
فوران بس اللبن بيفور

الأب.. صحيح تقريبا كله بيفور ما عدا
اللبن

الطفل.. طب الماء مالوش لون بس
ياخذ لون أي حاجة حط عليه أحمر يبقى
أحمر.. أزرق يبقى أزرق

الأب.. كمان مالوش طعم بس تحط
الملح يبقى مملح وتحط سكر يبقى
مسكر

الطفل.. طب أيه رأيك كمان أن الماء
بيسمع القرآن ويتأثر بيه

الأب.. قرأت الحكاية دي كانت رسالة
دكتورة لعالم ياباني.. سبحان الله

الطفل.. دا كمان الماء طلع له ذاكرة
الأب.. أراي بقى

الطفل.. يعنى لو غسلت أيديك ووشك
بشوية مية يفضل فاكر أنك اللي غسلت
وشك عنده

الأب.. لا لا دي جامدة جدا دا المية
طلعت حكاية كبيرة

الطفل.. على فكرة أول حلقة لدكتور
مصطفى محمود كانت عن الماء سنة
1972 تقريبا

الأب.. الله يرحمه

الطفل.. تكلفة الحلقة وقتها كانت 30
جنيه كان يدفعها من جيبه
الأب.. اه انت كده بتلمح لحاجة طالما
جبت سيرة الفلوس
الطفل.. أبدا عايز أعمل زيارة لمتحف
المياة في القناطر
الأب.. حاضر.. السبت إن شاء الله

تمت

مشهد 23 (القصور الذاتي)

الطفل.. القصور الذاتي
الأب.. نعم
الطفل.. القصور الذاتي سبب اللي
حصل لنا في العربية دلوقتي
الأب.. لا اشرح معلىش
الطفل.. أنت ماشى بسرعة 70 وفجأة
فرملة يعنى سرعة صفر بس جسمنا
لسه 70 فاندفعنا للأمام بس طبعاً
جسمنا بيقاوم عشان ما نخبطش
الأب.. تمام مذاكر فيزياء كويس

الطفل.. لا دي تجربة اسمها العلبة
بترجع لوحدها لقيتها على جروب
حكايات الفيزياء

الأب.. تعرف تعملها

الطفل.. عايز علبة لبن واستك ووزن
مناسب أو حجر بطارية كبير ولصق
واعمل لها لك حالا

الأب.. خلاص هأجيب لك الحاجات
ونعملها مع بعض

تمت

مشهد 24 فيثاغورث

الأب.. لو واقف أمام مستوطنة
صهيونية وارتفاع برجها 50 متر وأنت
واقف على بعد 70 متر وطلع لك
صهيوني وضرب رصاصة عليك وأنت
كمان ضربت رصاصة عليه.. مين يقتل
الثاني؟

الطفل.. مش عارف

الأب.. مش مهم.. المهم من قاعدة
فيثاغورث الرصاصة هتمشي كم متر؟

الطفل.. البرج ضلع والمسافة ضلع
يبقى هأحسب طول الوتر فيكون 2500
± 4900 = 7400 ونحسب الجذر فيكون
86 متر.. بس كده الصهيوني في البرج
سهل يقتلني وأنا مكشوف.. كده
هابقى شهيد

الأب.. لا كده أنت بتفهم حساب مثلثات
وقاعدة فيثاغورث

الطفل.. على فكرة بابا قاعدة
فيثاغورث مش هو اللي اكتشفها
الأب.. أراي؟

الطفل.. أمريكا لما احتلت العراق
2003 سرقوا الاثار اللي فيها ومنها
حجر مرسوم عليه مثلث فيثاغورث لما
كشفوا على الحجر لقوه قبل عصر
فيثاغورث بقرون والحجر في متحف
بأمريكا دلوقتي

الأب.. جميل ولسه هنشوف.. طالما
بنفكر

تمت

مشهد 25 (عدسة من الماء)

الطفل.. بابا عايز زجاجة ماء
الأب.. عندك في المطبخ أيه المشكلة؟
الطفل.. أنت متأكد أنها زجاجة ماء بس
الأب.. هيا ممكن تطلع حاجة ثانية
الطفل.. لو قربتها من ورقة النتيجة
هتلاقى الرقم بيكبر.. ولو بعدتها شوية
الرقم ينعكس بدل 29 تبقى 92 ولو
حطتها عمودي الرقم يصغر
الأب.. كده بقت عدسة مش بس ازازة
للشرب.. بس ياريت تجيبها عشان أنا
فعلا عطشان
الطفل.. حاضر بس حبيت نفكر شوية
تمت

مشهد 26 (البرتقالة)

الطفل.. بابا ليه البرتقالة بقشرها
بتعوم ولما أقشرها تغرق؟
الأب.. يا سلام طب المسمار بيغرق
والسفينة اللي فيها مليون مسمار
بتعوم
الطفل.. كلمة السر الكثافة

الأب.. مش كلمة سر دا درس فيزياء
الطفل.. في تجارب غير البرتقال
الأب.. أيوه مع العنب حضر كوب عادي
وكوب فيه ملح
الطفل.. العنب يعوم في المملح ويغرق
في العادي
الأب.. صح تعالى نشوف في تجارب آيه
عن الكثافة ممكن نعملها في البيت
تمت

مشهد 27 (ليه بنعمل حمام)

الطفل.. بابا أحنا ليه بنعمل حمام؟
الأب.. الانسان كده يأكل ويشرب وينام
ويجوع ويعمل حمام
الطفل.. مش كان أحسن لو كنا زي
أهل الجنة.. مفيش حمام
الأب.. الدنيا مش الجنة.. الدنيا فيها
تعب ومرض ومشاكل وظلم والراحة
في الجنة إن شاء الله

الطفل.. أنا فكرت أن الموضوع له
علاقة بالغرور والتكبر.. زي درس لنا
كل يوم عشان نبطل تكبر وغرور

الأب.. ممكن طبعا لان الانسان المتكبر
دا مشكلة كبيرة وربنا ما بيحبش
المتكبرين

الطفل.. أنا بأفكر في الحمام دلوقتي
على أنه درس يومي ليا زي النوم
بيفكرني بالموت

الأب.. صح كلامك.. أنت بتفكر كويس
الطفل.. أنت اللي علمتني أفكر في
كل حاجة

تمت

مشهد 28 (الريموت)

الطفل.. بابا أنت بتقلب القنوات شايف
الاشارة اللي بتخرج من الريموت

الأب.. لا طبعا هاشوفها أزاى أظن
سرعتها زي سرعة الضوء 300 الف كم
في الثانية.. هاشوفها أزاى بقى؟

الطفل..تقدر لو شغلت كاميرا الموبايل
بس نظلم الغرفة

الأب.. جميل

الطفل.. بس ليه شفتها بالكاميرا؟

الأب.. مش عارف أكيد في اساس علمي

الطفل.. ممكن نبدأ البحث ونعرف الاجابة

الأب.. ممكن بس أشوف النشرة الأول.. كفاية فيزياء

تمت

مشهد 29 (الموزة)

الطفل.. بابا أنا حليت مشكلة باب الشقة اللي بيزيق

الأب.. دهنته زيت

الطفل.. لا بقشر موزة والصوت اختفي

الأب.. أظن الزيت أفضل

الطفل.. الموزة حل سريع

الأب.. اه بس محمد الفاتح محطش موز حط زيت

الطفل.. مش فاهم

الأب.. في فتح القسطنطينة اللى هيا
اسطنبول انهارد جيش المسلمين
زحلق السفن على خشب عليه زيت
لتجاوز السلسلة الحديد اللى صنعها
العدو في البحر لمنع السفن من
المروور.. ودمر كل سفن العدو

الطفل.. فتح القسطنطينة حديث
لرسول صلى الله عليه وسلم
الأب.. صحيح بس مهم تقرأ وتعرف
التفاصيل

تمت

مشهد 30 (اوعى تتكهرب)

الطفل.. بابا أنت عارف ليه لازم تقف
على كرسي خشب وأنت بتغير اللبة
الأب.. عشان الخشب عازل للكهرباء
الطفل.. مش فاهم ما الكهرباء ممكن
تلمس أيديك ففي كهرباء دخلت
الأب.. صحيح بس لم تخرج وفضلت في
جسمك بسبب الكهرباء
الطفل.. يعنى مش الكهرباء اللى
بتموت المهم ما تمشيش في جسمك

الأب.. تقريبا صح بس أوعى تجرب
الحكاية دي خالص

الطفل.. ممكن نشترى جهاز تسلا
ونجرب

الأب.. قول يارب.. ادفع لك مصاريف
المدرسة الأول

الطفل.. ليه بتفكرني بالواقع المؤلم

تمت

مشهد 31 (ليه بنشوف بعض)

- ليه بنشوف بعض؟
- عشان عندي عين
- أشمعني عين ما أنا عندي مناخير وليه
- 2 عين ومناخير واحدة؟
- الضوء بينعكس على العين فنشوف
- ومش بينعكس على المناخير
- الضوء بيعمل أيه.. طب يعنى أيه
- ضوء؟
- طب ليه بنسمع بعض؟
- عشان الودان

- طب ليه بامشي على الأرض ومش بامشي على المية
- لو فضلت كده مش هتبطل أسئلة وحتى الاجابات هتفتح لك باب أكبر للاسئلة
- الجميل أننا بنفكر
- صحيح ويتفكرون في خلق السموات والأرض

تمت

مشهد 32 (الكانزي)

الطفل.. بابا أنت عارف أراي خليت
الكانزي تقف على جنبها

الأب.. لا دا درس فيزياء برده

الطفل.. بالضبط لما كنت بترفعني وأنا
بيبي كنت بترفعني من وسطي ليه مش
من شعري أو وداني

الأب.. عشان الوسط مركز الثقل
للجسم

الطفل.. بالضبط ودا اللي خلى
السفينة تايثانيك تغرق في أقل من
ساعتين

الأب.. عشان مركز الثقل باز بعد
التصادم بجبل الثلج
الطفل.. بالضبط
الأب.. بس بلاش تشتري كانز العرق
سوس والتمر هندي أحسن وأفيد
الطفل.. في تجربة ثانية بس عايز
شوكة ومعلقة وعودين كبيرين
الأب.. كويس الفيزياء مخلياك تفكر
كثير

تمت

مشهد 33 (كوب فاضي)

- خرطوم وشغل الماء
- تسمع صوت الماء
- ضع الخرطوم داخل الماء بالأناء..
مفیش صوت
- السبب تغير الوسط الأول الصوت كان
ماشي في الهواء والثاني ماء
- طب كوب فاضي وضع فيه ماء
- شايف فقاقيع لأن الماء طرد الماء
- الكوب مكنش فاضي الكوب فيه هواء
- طب شغل الحنفية وقرب الكوب
واسمع الصوت

- ابعد الكوب هتلاقى صوت الماء تغير
- سرعة الماء زادت مع المسافة
فالصوت أصبح عالي
- تخيل من الحركة دي حسبوا التسارع
أو عجلة الجاذبية الأرضية
- البيضة المسلوقة بتلف لو لفتها
بأيديك
- النيئة لا.. مش بتلف مهما لفتها
بأيديك
- ما السبب ما الفرق في التركيب بين
البيضة المسلوقة والنية
- طب ليه المعالق شكلها كده
- الموضوع له علاقة بالحرارة وانتقالها
- المعلقة محتاجة بحث ونفكر فيها
شوية

تمت